

四庫全書

集部

欽定四庫全書

蘭軒集卷八

元 王旭 撰

七律

芳州亭夜坐呈賈元播詩

菡萏池邊夜氣涼，幽人逃暑戀吟床。
乾坤半枕星河影，風露一襟花草香。
便擬將身遊汗漫，不須濯足問滄浪。
西園賦客今誰在，公子清遊興未央。

圍爐

多謝良朋不我踈肯來書室共圍爐既將蓮社盟同結
便覺蘭軒興不孤洩洩歡情到樽酒融融春意滿團蒲
淡中趣味閑中樂說與傍人解得無

西湖

綠波三面浸青山樓閣香圍萬頃寒蓬島忽驚塵世外
蘭舟如在畫圖間從來富貴歡遊處合作風流鳩毒看
斗米千錢人餓死近來簫鼓覺聲閑

某丞相出示御賜白海青馬圖

劍翮星眸百鳥雄九天擎出賜元功神姿淨刷陰山雪
逸氣寒吹碧海風掣電驚看千里速下鞞寧許一拳空
江湖不隔長楊夢如在君王指顧中

次韻酬王夢臣見贈

尋芳踏遍半人寰近向吾宗得蕙蘭才軼青雲攀豈易
詞高白雪和應難謙恭接物人人喜禮法持身步步安
更愛風流笑談處略無一語帶寒酸

紅葉

春風剪葉作琉璃
秋染胭脂又一奇
裏樹得非吳錦繡
草山仍似漢旌旗
林間收去因燒酒
水上漂來為寄詩
羨殺風流顏色好
飄零只是不多時

過淮

萬古支祁鎖未開
波濤誰遣怒雲雷
欲隨同侶匆匆渡
更待長風緩緩來
水恠呈形陰慘澹
舟人失色浪崔嵬
半竿斜日山陽郡
愁聽南風鼓角哀

立春

光陰流轉若循環白髮催人老不難
世事未知何日了
土牛還向此時看梅花送臘愁辭樹
蔬甲供春喜入盤
咫尺西園芳意動擬將詩酒慰荒寒

段宰吉甫金壇回舟有詩次韻

不肯折腰彭澤令清風留與後千年
雪殘鷓鴣人回首
路近蓬萊風引船故篋書隨朝服解
老梅枝映燭花燃
天下奇才段公子未應歸問酉陽田

遊竹林寺得裳字韻

嶽麓西溪古佛堂塵心到此便清凉陰生禪榻松篁冷
春入齋厨筍蕨香但得山靈留杖屨從教嵐氣濕衣裳
高歌欲盡登臨興惆悵碧雲遮夕陽

賀張可與郎中

日下天書拆紫泥異恩新拜九重知和陽氣轉東南域
造化春生左右司簿領要清官府事紀綱當正廟堂規
經綸才力如公少青史功名好自期

呈張可與郎中

共說庖丁善治庖解牛新試發研刀逸才騏驎空羣馬
醉眼螟蛉小二豪雲氣任從蒼狗變玉輝依舊白虹高
無窮宇宙無窮事且讀離騷飲濁醪

禍福窮通付與天只將名節較前賢孤根傲雪羣芳後
一尾追風萬馬前西北樓高雖可慕東南地下亦堪憐
麻衣自笑何為者空抱沈憂夜不眠

百鍊難消萬折東良金流水此心同卷舒由已雲誰繫
飲啄因人鶴可籠塵土路長霜鬢短江湖天濶月船空

南來無限梅花興
正要吹香鼻觀風

遊甘露寺詩

江山竒觀入遊遨
千古塵心洗鬱陶
寺好不知臨地險
詩成方覺倚樓高
風霜歲暮南征遠
鄉國情深北望勞
我欲問津還自笑
人間何地不滔滔

欲訪金焦怯怒濤
北山招我翠岩堯
中巖古寺名甘露
上有飛樓倚碧霄
牕几周圍納吳楚
攔干直下看金焦
詩成寒氣生毛髮
知是江風送晚潮

北固山頭甘露寺詩人來此看江濤
筇拖翠壁足方倦樓倚白雲身最高
天地華夷今混一山川吳楚舊雄豪
登臨得句無人和萬里長風吹鬢毛

贈詩人劉叔敬

鑿江初識紫芝眉湖海風流氣自奇
玉斧有神修月早靈槎無力上天遲
樽前風月忘懷酒袖裏山川得意詩
千古文章心印在與君深結暮年期

下邳有感詩

圮橋千古舊名存猶指留侯話本因進履不逢秦父老
策封安得漢宗臣壯懷鬱鬱重回首世事悠悠一欠伸
三卷素書傳教了不應豪傑便無人

感懷

南遊風阻洞庭船書劍曾依賈鹿泉跨鶴意輕金十萬
登龍名重客三千傷心東閣人何在回首西江月又圓
淮海樓高風雨暮哀歌誰和白雲篇

贈人

半夜天風起鄧林寒枝無侶墮驚禽茫茫宇宙無窮事
鬱鬱英雄未了心不向青雲爭得路且將白雪覓知音
招魂幸有巫陽在山鬼寧憂薜荔深

詩號山鬼漫通靈正事何曾補半星千里江湖南北路
三年風雨短長亭鄉心杳杳孤雲遠旅思綿綿宿酒醒
賴有黃金臺上客不妨彈劍寫飄零

龍

背上金鱗九九排驅馳神化走風雷抱珠入海蟠千尺

降雨興雲遍九垓夏后庭中空自訴葉公堂上為誰來
沉沉貝闕知何處深鎖滄溟叫不開

題靈隱寺

九里松風隔世塵山中別是一乾坤雲飄蓋影隨人脚
水寫琴聲出石根佛刹丹青窮土木檀那香火鬧晨昏
我來本為遊山事懶叩維摩丈室門

懷古

行盡蘇公萬柳堤却經琳館上崔嵬蓬萊閣後渾栽竹

香月堂前總是梅羽客似為雲挽住詩仙不共鶴歸來
荒祠寂寞清風在敬酌寒泉奠一杯

探梅得前字

月底橫枝夢隔年春風無恙想依然天涯驛使音書遠
雪裏幽人杖屨先翠袖籠香斜倚竹金鈴低水瘦含烟
清樽未洗何郎恨聊賦新詩慰眼前

書史陳君孝養詩卷

浚有寒泉樹有烏北堂甘旨未嘗踈靈椿壽入稱觴裏

萱草春深戲綵餘
穎叔遺羹心正切
毛生捧檄意何如
自慙白髮庭闈遠
長向天涯望倚閭

贈馮孝子

美矣馮君以孝名
皇家特與賜門旌
天心只用誠通貫
無目唯將舌舐明
青史書中傳姓了
綵衣堂上看春生
有身誰獨非人子
正要聞風慕效行

讀書心在聖賢鄉
戲綵身居孝友堂
俯仰不將天地愧
往來爭慕姓名香
堂中壽酒靈椿老
庭下春風玉樹芳

千古南陔詩意在為君歌此補亡章

落梅

夢裏霓裳返月宮酒醒誰與伴師雄探來么鳳腸應斷
舞到山香曲又終晴日驚飛千點雪晚香愁捲一簾風
留教烟雨青青子他日調羹別有功

上解萬戶

奏捷丹青獨列名劍鋒終擬戮長鯨素書夜講神機密
白羽朝揮號令明指顧蠻荆落姦膽笑談樽俎出奇兵

龍驤未老樓船在人道江南不足平

劍倚青霄氣吐虹聲名慷慨冠羣雄九重天上無雙譽
四海人間第一功金鼓暫將留峴首樓船終擬下江東
春風看奏金陵捷不數當年老阿童

遊南山寺

為愛南山若畫屏白雲扶杖上峻嶒香風似到諸天外
心印知傳佛祖燈誦聲磬驚回春哢鳥齋魚呼起畫眠僧
一甌茶罷題詩去懶話渠家舊葛藤

蚯蚓詩

形狀蜿蜒任卷舒，每因陰雨見庭除。
能傳地底閑歌曲，解寫泥中古篆書。
螻螻得時雖暫困，蛟龍失水亦同居。
飲泉食土平生操，未必於陵仲子如。

瀛山隱者

瀛洲仙人作隱君，山與蓬壺為一羣。
颼風輾輪不著地，海水接天都是雲。
蟠桃結子自足食，大棗如瓜誰與分。
見說閩山有樵者，空歌碧落兩相聞。

送傅夢得

驪龍貪抱海珠眠，雷雨成功晚十年。
羽翼起搏風九萬，雲霄飛擬路三千。
才名不負金閨彥，彩筆行追閬苑仙。
明月鳳樓歌酒夜，相思早寄斷腸篇。

送李清甫

才氣縱橫本不拘，弟兄賢達更相扶。
平生思義遵先訓，此日移忠展壯圖。
身似海鵬初變化，勢如天馬試馳驅。
功名建立他年了，不愧人間大丈夫。

蜂衙

常愛蜂兒兩度衙
海潮相應未嘗差
也知官府無多事
要識君臣自一家
考課聲喧因釀蜜
赴班身晚為尋花
百年浮事紛紛裏
一笑東風日又斜

過彭城

書劍離家第七程
扁舟今始過彭城
風雲不老山川勢
草木猶疑楚漢兵
落日正悲浮世事
奔洪忽送怒濤聲
黃樓有賦人何在
讀罷殘碑解纜行

上高侍郎聖舉

樂奏鈞天備八音
羌絲羯鼓漫哇淫
齊梁掃去文方正
洙泗傳來道更深
黃閣素隆當世望
白雲元有出塵心
高門不厭麻衣客
試作南山白石吟

雪

去冬無雪旱連春
今歲天公不負人
風景忽於窮裏變
物華渾比夜來新
敲窻細點時兼雨
照眼寒光不受塵
欲草豐年太平句
可無樽酒助詩神

寒屋瀟瀟覆夜雲夢回驚見月華新開門無復乾坤舊
到此方知造化神僵卧凍吟真我事淺斟低唱是何人
憑誰為向東君道飛盡楊花不用春

和家兄韻

一夕寒齋卧欲僵起來天已降休祥聲蕪凍雨初蕭颯
勢逐陰風忽簸揚閭苑有花開玉樹仙人無事舞山香
農家莫問來年事管取相逢說大穰

雪夜舟行

沙留殘雪照平灘舟擁輕冰下急湍兩岸清風人語靜
一川明月櫓聲寒逢人漸覺鄉音異屈指還驚歲序殘
滿眼雲山歸計在家貧親老自難安

挽沐長老

空門得法萬緣銷龍象高名動兩朝筆有雷風唐智永
詩無蔬笋宋參寥魂拋宇宙雲歸岫會散人天海罷潮
千古龍興寺前月夜來依舊挂青霄

白髮

點破春風兩鬢青
素絲長短映梳明
愁邊舊說三千丈
病後新添一兩莖
苒苒塵埃侵暮景
瀟瀟江海半餘生
回頭宇宙無窮事
一笑蓬窗曉日晴

睡境

物外乾坤本渺茫也
無城邑限封疆
昏昏倦枕投身入
蕩蕩玄風與世忘
佛氏號為清淨國
詩人呼作黑甜鄉
希夷欲訪真消息
試問南柯古郡王

送崔令北上

百鍊鋼磨製錦刀吏姦民隱動秋毫三年有作人皆順
五事無虧政可褒雲氣任從蒼狗變玉輝依舊白虹高
鳴琴本是經綸手莫遣功名愧二毛

牛刀一試訟庭空大着規模起學宮屈指試將今日數
用心誰與我公同應酬官務非無事作養人才別有功
聞道九重方構廈棟梁宜在斧斤中

冰花

只道窮冬萬物藏玄冥誇巧出瓊芳形超衆色空無界

面妬春風冷不香桂影分明橫壁月梅枝彷彿卧銀塘
寒齋一笑驚看處未要扶桑上太陽

送杜按察還家

閩海清風掃瘴烟洗寬澤物過三年都將水月澄心地
不遣塵埃染性天政有生碑留別國身無餘物入歸船
故鄉雖好知難戀共望經綸秉化權

出都

書生情性本踈慵剛被窮愁著力攻自昔何人知相馬

只今有技漫屠龍可憐寒食風光好又向長安客舍逢
看盡紅芳一千樹歸尋秋水種芙蓉

姑蘓臺

自古奢淫是禍胎姑蘓何用起高臺屬鏤才賜忠臣去
麋鹿便隨春草來風雨尚餘遺迹在山川空使後人哀
一杯畧挽樵翁住共話興亡坐石苔

長橋夜月

巨浸誰施利涉功飛梁千尺跨長虹拖筇影照吳江月

倚柱涼生笠澤風塵土不生
冰界內乾坤都在玉壺中
漁歌遙聽知何處烟水茫茫四望空

歌風臺

沛水橋邊土一堆行人云是漢王臺
悲歌一旦風雲斷往事千年老父哀
富貴不忘生處樂英靈猶想夢中來
若知猛士真難得蓋世韓彭安在哉

蝌蚪

尾細頭圓色墨如一生常向水中居
不因穀粒丘甌藥

得見千年孔壁書生菜豈知遺種後震雷方識化形初
他時若作蟾蜍去莫上青天惱望舒

讀荆軻傳

燕弱秦強可奈何區區徒倚一荆軻雄心不了咸陽事
餘恨空留易水歌立志本將賢自許書名翻與盜同科
可憐豪傑千年下猶撫遺編感慨多

欲報燕丹養養恩直將匕首入強秦君王有變親環柱
壯士無功謾殺身嫌此武陽非我客愛他屠狗是何人

千年易水悲歌在長使英雄恨若新



蘭軒集卷八

欽定四庫全書

集部

蘭軒集卷九

十九

詳校官中書臣羅錦森

侍讀臣孫球覆勘

謄錄舉人臣李憲喬

謄錄舉人臣楊 紹

欽定四庫全書

蘭軒集卷九

元 王旭 撰

五言絕句

蟋蟀

入秋聲百種唯爾最知時
夜夜催機杼貧家安得絲

梅花絕句夢中作

欲作松筠友寧辭霜雪寒
百年佳實在留與子孫看

雜興

逍遙天地內本是一閒人却笑周婆婦懷憂浪苦辛
我有東山約歸歟定幾時流年不相待添滿鏡中絲
夢覺聞風雨寒聲隔紙牕關心無限事起坐對殘缸
老廢觀書眼空閑永夜燈蒲團依壁坐何異一禪僧
天理全真實人心去吝驕要知顏子樂元不在簞瓢
移得黃花菊開時已過秋一雙何處蝶來為晚香留
遺糞戰羣蟻腐鼠落飛鳶佇目秋風外孤鴻入暮煙
雨露青霄遠風霜白屋深有心圖富貴應不到而今

有客談金馬無心羨石渠他年携野史深入白雲書
懶廢交游禮貧踈骨肉恩流年過半百行止任乾坤
位重憂方大財多怨亦歸人生要無累貧賤一麻衣
錦衣思尚絅君子亦何心胡不觀謙卦山藏九地深
天地雖云大猶將形器拘誰能超物表獨與道為徒
希聖與希賢工夫不偶然掃除心上地開廣性中天
炎炎燎原火始自一星然須信情當節誰云怒可遷
天地元無蔽人心本至靈奈何將物欲遮塞自頑冥

山溜能穿石元非一日功學無堅久力安得聖門通
萬丈滄溟底神珠尚可求讀書不知道安可等閒休
寶鑑塵昏却重磨復舊明人心何異此改過善還生
寡欲可延年存心即事天神丹何日就香鼎亦虛然
釋子談空寂神仙竟渺茫古今天地裏惟有一網常
男女無親授當知嫂溺援世無鄒孟氏誰與辨經權
木怪翻基壽龜靈反速刻世情機械外吾亦愛吾愚
嗜利和心醉爭名至死忙誰能超此累莊子在魚梁

有定乾坤理無私造化心當時鑪冶內枉作不祥金
有說皆非道無言乃是天當知六經外別自有真傳
世儒箋注學愈說愈支離道妙忘言處幾人真得知
久視能傷目多思亦損心焉知心目外有道自玄深
博學資詳說當知反約功聖傳精一處只在片言中
乾坤唯一理無古亦無今不有天忠恕於何觀聖心
澹泊忘塵慮逍遙養道心願為無用瓠羞作不祥金
白髮滿青鏡功名心已休春風吹夢覺周易在牀頭

七絕

九日遊靈泉

一山紅葉四山秋，落日青山水急流。
記得僧窗舊詩句，看題已是五年遊。

真樂何妨竹與絲，綠苔石上兩三卮。
松風一曲無宮徵，別是山靈勸酒詞。

蜘蛛詩

手脚針攢腹，彈如物中機。
巧最憐渠往來殺，盡飛蟲命。

猶自添絲恨網疎

又與柔絲滿腹多只將結網害蟲蛾機心用盡千般巧
風雨來時奈爾何

宿州道中

九月今年煖未霜行人猶著袂衣裳道中受用君知否
滿意西風野菊香

避寒須酒多難飲縱目孤城覺易行前去維揚猶七百
黃雲衰草宿州城

芙蓉

夢入神仙海外城
醉紅香擁萬娉婷
覺來煙雨秋江晚
依舊騷人伴獨醒

贈中和書院主人高伯川

道衰誰復重斯文
書院興修獨有君
四海高名千載事
繁華回首一浮雲

華屋中藏萬卷書
更將殊禮聘師儒
方當世教陵夷際
用意如君更有無

題贊化書院

造化全功體自然一誠之外更無天天人一理流通了
更說區區贊化權

篤實輝光日日新自然天理妙無垠從今贊化堂中客
勿守千秋紙上塵

寒食舟中有感

舟楫江湖日日風今年寒食去年同九原松栢傷心色
長在天涯淚眼中

雜興

夢入蟾宮倚桂眠，覺來風露滿寒天。
霓裳按曲非吾事，且趁清光理斷絃。

讀罷西山夜氣侵，蒲團倚壁靜存心。
清光愛殺牕間月，只欠梅花無處尋。

縱得梅花月裏看，吹人無奈北風寒。
爭如外物都忘却，只把神珠照玉盤。

有客相過論坎離，陰陽翻覆竟誰知。
三杯徑造神仙境，

却笑還丹得效遲

閉目心遊萬化初工夫非有亦非無平生不解參同契
好箇濂溪太極圖

天包地外地居中天自無窮地有窮地是有形天是氣
氣形皆以道為宗

日裏陽禽是月烏月光還是日之餘乾坤中氣成離坎
誰使陰陽互換居

揚州城下

文章辛苦事無成碌碌因人作遠行舟繫揚州古城下
一宵風雨白頭生

燕城書懷

紫垣星月隔紅塵桃李朱門次第春日暮東風倦遊子
袖中瑤草寄何人

四壁相如病更侵青衫塵土倦遊心臨邛萬里秋風殿
狗監誰教識上林

萬方玉帛走神京四海車書會漢庭宣室夜深前席後

不知誰語到生靈

上天行雨說堪愁
電掣雷轟不自由
留取明珠江海去
葉公堂上莫回頭

野雲孤影落陽臺
悞看荆人意外猜
正使夢中為雨去
到頭終是等閒來

東湖感事

手栽桃李盡成陰
碧沼流泉日已深
狼籍東風舊臺榭
行人誰有故侯心

主人當日重繁華，不惜黃金貴買花。
十載東風成一夢，覺來春色是誰家。

三十年來種松栢，一朝斤斧盡須臾。
霜枝雪幹空無數，不及甘棠只一株。

碧雲冉冉日將暮，芳草萋萋人未還。
感興詩成誰會得，晚風搖動水中山。

戍樓殘照

廢壘無兵鼓角閒，小樓空倚夕陽間。
風帆煙柳危欄外，

只欠供愁數點山

盧龍久已屬神州誰認歌樓作戍樓莫說關頭興廢事
江山猶為石郎羞

登鯨川樓

莫怪登臨著句難謫仙曾此醉憑欄長庚不續人間夢
惆悵空梁落月寒

東城春早

鯨川東郭盡園林春到先看柳弄金早晚遐觀亭上去

細窺天地發生心

晚春途中

徑路相攙轉處迷
林深時聽一聲雞
料應昨夜東風惡
吹落殘花滿樹西

題長春子翰墨

好生能廣君王德
此是長春第一功
仙事有無吾不解
且看遺墨頌清風

蟋蟀

草根如泣復如歌愁入西風不奈何莫道貧家無可織
機絲雖少鬢絲多

小蟲誰遣競吟秋氣動天機不自由豈是有心能恤緯
一身也自為寒愁

鮮于伯機出示其祖母太夫人遺墨敬書三絕
其後

栢舟高節重當年教子成家母道全彤管有才天路遠
一簪白髮賦歸田

眼中歸計田園樂夢裏秋雲富貴輕故紙塵昏遺墨在
細看猶足見高情

春雨關心南澗蘋秋風吹恨北堂萱三光不照重泉夜
空抱遺書泣孝孫

瓊花圖

后土祠前玉一株國香曾歎世間無春風十里揚州路
爭似題詩賞畫圖

三月揚州車馬塵一花驚倒世間春南山雪底孤松樹

終歲摩挲能幾人

題曹彥禮褒德集後

積德初無望報心流長方覺慶源深親書不減瀧阡表
更要高名壓士林

天上玉堂操筆遠人間白雪斷絃多黃塵不泯幽人德
太史文中有蓼莪

澗阿功不到明堂螻蟻風霜老棟梁早晚蘭臺專筆削
普將潛德發幽光

我與君家舊往來兒時猶記拜庭階
老成零落鄉風變
撫卷題詩一愴懷

武王扇暍圖

小惠私恩聖所譏武王扇暍事堪疑
茫茫萬里周天下
生死無邊可盡知

炮烙乾坤雨露來鹿臺財散鉅橋開
君王扇底清涼少
別有仁風徧九垓

夜雨有感

天地雲雷夜晦冥
急風吹雨入疏櫺
可憐兒女癡貪睡
濕盡衾裯喚不醒

周孔傳道圖

聖道如天冠古今
初無傳授可窺尋
要知闕里周公夢
只是三王四事心

喜雨絕句

香火靈壇日日齋
祈天惟恐旱為災
滂沱一尺豐年雨
原自使君心上來

蘇州

取易安難自古然正須經理付才賢乾坤總是皇家物
雨露榮枯莫要偏

畫戟清香五字詩韋郎長恨不同時多情一片西樓月
照見清樽有所思

伯牙鼓琴圖

山海歸來操愈奇賞音纔得一鍾期爭如帝舜巖廊上
一曲薰風舉世知

題山人鼓琴圖

風露空山秋氣深
併將流水入瑤琴
時人未洗秦箏耳
惆悵誰知此夕心

千古知音一子期
子期亡後復誰知
朱絃縱有陽春曲
鼓向空山為阿誰

贈送徐月洲

夢斷漁蓑月滿洲
靈槎忽作上天遊
黃金不買相如賦
只把生靈作話頭

玉簪花

琅玕斜插翠雲莖
夢覺幽香月滿庭
白髮欲簪還自愧
且收風露入銅瓶

蓋大使送行

大貪多假廡為地
誰辨真廡不是貪
老眼西臯非妄許
此名君受可無慙

觀李思訓幸蜀圖

四海兵戈起
宴安劔門風
雨翠華寒
蜀山若比君臣際

未是人間行路難

西園秋暮

夢斷繁華到曉霜
西園從此便淒涼
一樽為向遊人問
誰愛黃花晚節香

弔漢卿

多情造物薄情天
只與才華不與年
留得送行詩卷子
一看名字一潛然

文章辛苦竟無功
世事黃梁一夢空
日暮騷魂招不返

斷雲流水各西東

原注漢御嘗有詩云家在斷雲殘照底好隨流水各西東不數日以疾卒

何其

識哉

讀丹經

九曲江頭玩月歸滿懷分得玉蟾輝五行顛倒無人識別是乾坤造化機

一氣旋乾復轉坤黃河逆走上崑崙釀成甘雨從天下潤徹人間草木根

徽宗六鶴圖

衛國乘軒事已非君王此筆為誰揮
只應萬里黃沙漠正羨遼天老令威

四皓圍碁

羨教商顏四老翁退身高卧白雲中
誰知一著機心在便與人間楚漢同

題雪屋圍碁

雪屋蕭條冷射袍對枰仙客寸心勞
眼中有路機關巧正要經營一著高

越中西施灘

苧蘿山小映斜陽萬古邪溪草木香西子若知亡國罪
浣沙應悔嫁吳王

挽陳彥明先生

一生多抱廣文窮晚落龍蛇歲轉凶日暮騷魂招不返
傷懷秋草見遺封

清溪晚步

哀絃斷續風吟木古錦爛斑石暈苔日暮清溪無伴侶

杖藜獨為水聲來

落落雲山宿雨晴
瀟瀟風柳晚涼生
溪頭有片蒼苔石
坐聽潺湲瀉玉聲

宮井

石甃團團宮井深
玉欄猶想翠桐陰
銀瓶汲水今何在
落日行人生渴心

雜詩

東流江水不西還
六代興亡一夢間
行客有懷誰會得

鳳凰臺上看東山

江聲不洗六朝悲，又看繁華到黍離。
力盡英雄春一夢，青山依舊夕陽遲。

玉樹歌殘宮井深，干戈元自晏安尋。
黍離不為宗周賦，要使驕王一動心。

春風芳草綠秦淮，商賈行舟日日来。
曾有故園書信否，水邊橋上幾徘徊。

九曲清溪萬柳堤，鏡中樓閣照東西。
春風無復瓊枝夢。

拄杖尋花避疾藜

清斯池

碧沼流泉一鏡清
等閒風浪不曾生
池邊寄語來遊者
但濯塵心勝濯纓

山茶

葉映湖山滿翠陰
花搖鶴頂更紅深
誰知冰雪寒梅外
獨有春風富貴心

晚牧

葛洪澤畔三生夢甯戚山前半夜歌爭似太平村落好
淡煙衰草夕陽坡

沛宮

置酒重臨舊沛宮風雲歌舞到兒童當時不遇秦無道
也一山東田舍翁

九五龍飛返故鄉劉郎非復舊劉郎淮陰夷滅彭英死
却恨無人守四方

御賜玉杖詩卷

玉杖扶天價萬金
賜來恩寵一何深
英雄好盡平生力
仰副君王倚藉心

聖朝尊老重功臣
玉杖驚傳寵賜新
他日用時君記取
先扶家國後扶身

三教煎茶圖

石鼎風香松竹林
三人同坐不同心
從渠七椀澆談舌
爭似忘言味更深

異端千載益縱橫
半是文人羽翼成
方丈茶香真餌物

釣來何止一書生

晚景

煙霞牢落淡秋容
林壑踈明瘦晚峯
松竹南溪有幽寺
風來忽聽一聲鐘

秋日桃花席上酬王晉卿

霜滿黃花蝶也愁
一枝春色為誰留
相逢不減玄都觀
獨恨詩人兩鬢秋

天紳泉

天紳曾束玉皇腰
賜與神孫下九霄
只恐世間塵土污
白雲看守桂山椒

耘軒

庭院春風掩綠苔
小軒終日為誰開
塵心著力耘鋤了
不必農家隴上來

六一泉

平生夢寐歐陽子
今日經過六一泉
笑領松風酌寒碧
露芽從此不須煎

書望湖亭

江漢歸心日夜東，惱人還值打頭風。
今宵剝買吳城酒，且著湖山醉眼中。

乾坤南北一囊詩，湖海胸懷漫自奇。
日暮君門猶萬里，麻衣三策鬢成絲。

匏瓜亭

水萍風絮寄天涯，旅夢經年不到家。
今日題詩還自愧，此身安得似匏瓜。

秋日海棠

霜滿沉香萬事非阿環應悔覺來遲
碧羅衫薄秋風惡
辛苦重粧却為誰

繁華夢斷錦城春多事秋風為返魂
燕子不來庭院悄
斷腸詩裏又黃昏

千古詩人恨莫裁只緣香色不同開
誰知擾擾狂蜂蝶
總是濃香引得來

南湖雨中

淡淡煙中小艇回芙蓉花外有輕雷平湖一目三千頃
高卧南風看雨來

氣涵雲外草堂虛蘋末風來午夢餘起逐鄰翁上船去
藕花深處看叉魚

三年身不到江湖慚愧煙波舊釣徒今日扁舟復何日
卧聽風雨鬧黃蘆

荷葉青青水濕衣南湖日暮採蓮歸菱歌一曲風生浦
幾處衝煙白鳥飛

南浦風高咽櫂歌
木蘭舟重採蓮多
青蓑不脫和煙卧
細雨斜風奈我何

綠醅新壓白魚鮮
日落厨香煮碧蓮
主意殷勤須醉飽
夜深同上釣舟眠

黃金不買廟堂憂
散髮烟波謝遠遊
咫尺鱸魚高興動
阿誰隨我上扁舟

水面雲生天氣昏
望中烟雨暗前村
採菱歌罷扁舟去
日暮誰招楚客魂

詩酒人誇甫里仙
鱸魚今覺季鷹賢
麻衣不謁黃金殿
須卧烟波老暮年

白蘋烟淡雨濛濛
蓑笠人歸釣艇空
安得西齋陳處士
水邊同醉芰荷風

題明妃圖

妲己傾殷褒喪周
女戎伐國勝戈矛
丹青枉罪毛延壽
嫁禍穹廬本善謀

漢宮佳麗知何限
去一蛾眉未足哀
不見千年靖康後

羶車盡載六宮來

無鹽醜女后齊宮絕色明
妃嫁遠戎世事由來有翻覆
人生何處問窮通

有懷泰山十絕句寄家兄景明

昨夜山靈入夢來問余何苦戀塵埃
幾時雲月堂前地
共拂松華坐石苔

紅塵不是不思山世累相縈未得還
為謝英靈勿多怪
白雲終擬暮年閒

春風花落紫藤枝正是山蔬可擷時惆悵故園歸未得
興來空詠採薇詩

石上無禾養伯齡種雲鋤月漫闕情飲泉卧聽松風曲
別是人間一段清

白髮相看老弟兄終年離別若為情何時對榻蕭齋裏
共聽松杉夜雨聲

泰山山下一茅堂松柏青青繞石墻我有讀書緣未了
他年歸守日終長

富貴浮雲不動心靜緣元只在山林著書飲水成高卧
人海從他風浪深

瑤琴不鼓性如癡何必人間覓子期留得山房書萬卷
此心終有聖賢知

仙翁授我還丹訣火候分明藥物全只欠靜功三萬刻
幾時真得斷塵緣

我與英靈舊有期等閒猿鶴不須悲東風吹覺還山夢
又向殘春聞子規

黃華先生墨竹

湖州能與竹傳神筆到黃華又一新千古蘇墳呼不起
賞吟誰是後來人

讀書有感

夜光明月世難尋只為龍宮鎖閉深安得天吳搜海藏
盡將奇寶慰君心

觀獵

非熊一獲渭陽田定鼎宗周八百年千載獵賢人不過

長楊空賦射熊篇

題行臺掾劉正卿北歸詩卷

三年飲水掾行臺
醒眼常將靜裏開
明月歸舟無別物
只携詩卷過江來

題梅雀圖

綠毛么鳳探來遲
先被疎籬凍雀知
日暮天寒花易落
莫教踏動雪霜枝

題鴈鷺圖

鴻雁飛鳴白露寒夕陽招得下前灘
弋人繒繳休輕舉
驚散江湖再聚難

登蚩尤臺

蚩尤臺上獨來時落日臨風動遠思
獨鶴不須爭燕雀
山林元自有閑枝

北極風寒日影微梧桐吹折鳳凰枝
詩成一笑無人會
小院黃昏雀滿籬

遊金陵保寧寺

梁武空齋十萬僧禍來曾不救臺城江山留得當年寺
依舊秋風鈴鐸聲

晚步

草沒行蹤一徑斜西風開滿蒺藜花行歌曳杖不知遠
轉過青林又幾家

市橋月色

市聲初息水聲聞月照虹橋夜未分欲就微瀾觀玉塔
却愁天宇放浮雲

對月

素月飛來雲亦生
浮雲過去月還明
舉頭一笑呼兒問
知是雲行是月行

贈趙鈍軒詩二首

名場聲利日奔馳
舉世能甘鈍者誰
寂寞軒中老居士
此心獨有斲輪知

龜策堂深萬慮安
瓦爐香盡易編殘
乾坤一劍無今古
莫向鋒銛露處看

雪中馬上口占

閨苑瓊花散不收
天風吹滿玉驂騑
朝來一笑成詩處
似跨崑山白鳳遊

梅花絕句夢中作

春風無伴易飄零
冰雪寒香似獨醒
恨殺三閨綠底事
不將題品入騷經

感懷

碧海波深不自藏
等閒來見葉公堂
不成風雨空歸去

慚愧龍宮見阿香

送成生

家貧親老室無人三十麻衣未立身
聞道朱門愛桃李何妨添此一株春

東家貧女出無衣去傍西鄰織錦機
堂上主人刀尺在不應風雪抱寒歸

記夢

壁月珠星兩寂寥五雲佳客舊同袍
鳳笙別後崑山遠

靜聽天聲是海濤

夢到蓬山頂上來五雲春暖碧桃開
三杯未盡羣仙酒
又被晨鷄喚夢迴

留別孫唐卿

澗有長松谷有蘭人材休把一般看
簿書鞭朴塵埃地
元有高人待歲寒

菊花

不將濃艷鬪春紅別有清姿帶露融
笑傲東籬香自遠

一庭明月半簾風

堆金集錦傲霜華
籬落依然處士家
自愛清香堅晚節
羞將艷逐海棠花

旅懷

蕭蕭庭菊瘦
凌霜叢下幽蟲語
夜涼兩鬢秋
風對花坐
淡中詩句暗中香

縹緲雲衣弄月鉤
河聲低傍屋山流
胡床坐我桐陰下
風露瀟瀟兩鬢秋

寄李漢卿

碧雲天遠鴈書遲感舊空吟送別詩
記得分襟腸斷處
滿天風雨下樓時

跋唐秦王擒竇建德圖

力在英雄命在天降王金鎖亦堪憐
五年爭戰成何事
虛負漳南二頃田

題李清臣分齋

命有窮通非我力性無加損是天然
齋居更要分明看

物物中間太極全

一段良田與衆分
短長高下各均勻
藩籬有限休侵過
侵過藩籬是別人

雜詩

平生雅志在山林
世事縈人未遂心
早晚隨他猿鶴去
杖藜不厭白雲深

長身索米侏儒飽
飛將無功妄尉侯
世事紛紛本難料
雲山招隱去來休

貧賤身安富貴憂生涯粗足更何求他年杖屨紅塵外
只要青山伴白頭

問津入海厭風濤歸卧雲山一布袍人爵得如天爵貴
權門爭似聖門高

世事無邊白髮催坐消心火到寒灰相知只有南牕月
肯送清光夜夜來

水燈

曾聞水府祕神姦久擬然犀下照看今夜華燈誰點出

分明照徹貝宮寒

元夕有感

九陌塵香士女喧
舊遊燈火憶東原
西來忘却黿山夢
一盞吟燈過上元

箕和尚山中元夕懷京都

一燈明處萬燈明
天上人間不夜城
前日惠林洪覺範
雪牕孤坐聽猿聲

幸齋

名場虎穴三千丈仕路羊腸十八盤歸占一間真有幸
不應猶自夢長安

夢題僧壁

空負凌雲萬丈才半生踪跡困塵埃清晨一碗參堂粥
也逐山僧例子來

題蕭提舉所藏馬遠十色菊圖

能將晚節傲霜風顏色何妨外不同却恨世無陶靖節
相逢長在寂寥中

二月二十七日自鄆城還東平拜掃途中作
雪消平野淨無塵
桃李都無半點春
不是陌頭楊柳色
東君何以慰行人

題杭州廢宮

世事春風過眼花
湖山空鎖舊煙霞
故宮留得長生樹
啼盡流鶯到野鴉

詞

雪中看梅花

踏莎行

兩種風流一家制作雪花全似梅花萼細看不似雪無
香天風吹得香零落雖是一般惟高一著雪花不似
梅花薄梅花散彩向空山雪花隨意穿簾幙

端午

水調
歌頭

漱齒汲寒井理髮趁涼風先生畏暑晨起笑語聽兒童
說道今年重午節物隨宜稍具還與去年同已喜酒樽
列更覺粽盤豐願人生長醉飽百年中獨醒竟復何
事憔悴佩蘭翁我有青青好艾收蓄已經三載療病不

無功從此更多採莫遣藥囊空

鯨川四重午歲月若飄風詩書萬卷何事白首課兒童
試把楚詞高詠更取清樽細酌醒醉竟難同俯仰百年
了求足不求豐愧吾身猶未脫世塵中還丹有訣誰
悟回首憶仙翁我欲乘雲歸去獨與山靈晤語修道倘
成功笑謝醞鷄瓮白日看長空

離豫章舟泊吳城山下

大江東

南游三載只江山不負中原詩客萬里行裝無別物滿

意風雲泉石牛斗星邊靈槎縹緲鬢影銀河濕哀歌誰
和劍光搖動空碧 回首帝子長洲洪崖仙去風雨魚
龍泣海外三山何處是黃鶴歸飛無力天上佳人袖中
瑤草日暮空相憶乾坤遺恨月明吹入長笛

春夜

臨江
仙

簾外瀟瀟風色惡呼兒掩上重門小窗孤坐賦招魂碧
梧花落盡籬雀又黃昏 回首人間行樂事春風過水
無痕旅游誰肯重王孫長歌人不解明月照空尊

夢裏還家喧笑語覺來春色他鄉瀟瀟風雨入離腸有
詩還洒壁無酒不傳觴 試問凌烟辛苦地爭如畝畝
南陽誰教山鬼伯龍傍人間無限事歌罷倚繩床

次李公敏梨花韻

滿江紅

客裏光陰又逢禁烟寒食節花外鳥喚人沽酒一聲清
切風雨空驚雲錦亂塵埃不到冰肌潔對芳華一片惜
春心誰邊說 難便與東君別更莫把繁英折恨山香
舞罷玉鸞飛怯休道梅花同夢好黃昏只解供愁絕

洗粧來應笑老書生頭如雪

不愛浮花元只愛松筠高節歸去好草堂風雨對牀
心切東魯雲山多秀麗西溪泉石尤香潔待英靈重
入夢中來分明說今古異行藏別身易退腰難折信
叫閤非勇閉門非怯玉斧已修明月就瑤琴何必朱絃
絕試回看前日利名心紅爐雪

聽姜惠甫摘阮

木蘭
花慢

想高情千古誰得似仲容賢把山海遺音寫歸玄璧妙

絕當年清風竹林人去被哇淫迷却性中天不有黃臺
公子寧聞清廟朱絃 博山香底坐癯仙幽興想飄
然笑嫋嫋繁聲三生兒女恩怨留連回頭月明千里正
松風巖壑和流泉座上神游八表知音不在言傳

中秋和人韻

水龍吟

西風萬卷堂空卧聽簫鼓誰家宴多情唯有碧霄明
月肯來相見因記當年南樓老子座中賓滿把清談當
却彈絲吹管誰更問霓裳按 夢裏仙游驚斷悵天涯

故人難面空留玉斧修輪斫桂又成衰晚水調歌殘壯
心都付一聲長嘆對清光不寐呼兒取酒不妨重煖

和張都運李氏柳塘賞荷韻

水調
歌頭

我愛此塘好碧水映紅渠垂楊裊裊煙籠綠髮倩風
梳醫却塵埃俗病換起滄浪幽興懷抱一時舒更把直
鈎釣得意不須魚憶當年吟北渚醉西湖蘭舟撐入
雲錦未必畫中如世事春風一夢回首歡遊安在烟海
隔蓬壺清賞有今日題壁記來初

賀正詞

春從天
上來

斗轉寅方正鳳歷頒春泰應三陽河山衍慶宇宙呈祥
瞻帝闕五雲鄉想千官拜舞萃龍庭圭碧煒煌祝君王
願皇基鞏固國祚靈長 休言太平無象看武偃文修歲
稔時康惠澤橫流仁風遠被四海歌頌洋洋戴堯天舜
日將何報金鼎焚香捧瑤觴奏鈞天一曲萬壽無疆

為宋太守壽

臨江
仙

莫怪今年秋事晚黃花不在重陽天公留泛九霞觴故

教爭十日風露壽華堂
豪傑如公誰得似平生義膽
剛腸功名回首付諸郎靈椿長不老桑梓有餘光

為張可子郎壽

大江東

九秋風露洗塵埃人似華峯孤立蘭省東南經濟地正
賴風流籌畫湖海曾襟冰霜氣節邈矣公難及蒼生
望重故園休夢泉石且對得意江山登臨一笑香滿
黃花席更把西湖都釀酒醉取白雲詩客乘興為公遍
遊仙府檢下長生籍妙毫濃墨書公壽祿無極

壽黃鎮撫

臨江仙

莫怪今年秋色晚黃花留過重陽要隨仙客九霞觴助
添無量壽滿意泛清香 富貴功名天已了何須更問
行藏安排紫綬與金章五雲鄉不遠高舉看翱翔

為子周兄壽

臨江仙

童稚相看今白首情因兒女尤深霜天昨夜捲層陰舟
中明月照華屋壽星臨 氣斂風雲歸寂寞誰知經濟
雄心南陽煙雨卧龍吟行藏安所遇有酒且同斟

壽劉運使鵲橋仙

乾坤清氣山川英秀鍾作人間豪傑年年歡慶九秋時
看開到堯奠一葉高明器宇經綸手段儘辦得功名
事業待調元受了廟堂宣更受道長生仙牒

壽碭山蔣令

木蘭花慢

孟春纔過了看兩葉拆堯奠正杏蕾包紅梅花謝白楊
柳回青東風此時須記是當年河嶽降英靈刀筆名香
禁暑絲綸寵佩天庭夜來南極老人星光彩照前廳

見廳上高人鳴琴清坐闔境安寧因來捧杯添壽指莊
椿直到八千齡更有無限福祿汪洋別比滄溟

壽泰安石監州

木蘭
花幔

泰山雄勝地人物出必豪英看衍慶堂中使君才氣磊
落高明春風又臨初度正梅花香滿臘嘉平喚取茅仙
送酒樽前共祝長生青雲居第築初成燕雀亦歡聲
佇夢協熊羆祥占弧矢蘭玉春榮山城豈能淹滯佩飛
霞終上紫霄行留着蘭軒老筆他年歌頌功名

壽高伯川

臨江
仙

莫羨生三秋八月氣溥風露清明誕來人世作豪英性
天元廣大心地儘寬平 書院興秋誰得似燕山竇氏
齊名一身長向善中行松筠同不老龜鶴共長生

壽張都運父

臨江
仙

瑞氣充閭朝不散懽聲浮動庭槐九天邀下壽星來歌
翻白雪調酒泛紫霞杯 八十康強誰得似仙風擺落
塵埃斑衣人是棟梁材他時黃閣上同看碧桃開

揚州壽夾谷士常

木蘭
花慢

醉西湖壽酒歌舊曲已三年喜萬里湖山歸來相見
淮海樓邊春風繡衣無恙喚竹西歌吹共留連世事浮
雲千變靈臺孤月長圓一官聊辦買書錢行橐故蕭然
有夢裏青山詞中白雪徽外鳴弦悠悠紫臺歸路樂因
循詩酒墮凡緣借問蓬萊宮府何如平地神仙

揚州壽紀子周

木蘭
花慢

皇天憂世難生俊又佐時來有忠孝誠心文章大手經

濟雄才他年漢庭三策要青雲高步出塵埃兒女徒驚
氣岸丹青莫狀靈臺詩人清骨即仙材何處覓蓬萊
便喚取何郎一樽同醉東閣官梅充閭鬱葱佳氣挽春
風都入紫霞杯休道壽君無物滔滔萬里江淮

壽陳公望

木蘭
花慢

問東原豪傑先屈指到元龍看瀟灑風標汪洋學海磊
落詞鋒沂川幾回來徃把乾坤歌入舞雩風妙理鳶飛
魚躍塵心雪化冰融
梅花香外歲寒松高節謝春容

有千歲神膏扶君壽質閱世無窮仍呼九天鸞鶴與王
喬相約叩瓊宮但使飛霞佩在寧愁白玉堂空

壽高伯川

東大江

月臨南呂正庭階開到堯莫三葉風露清明鍾氣質誕
作人間豪傑器宇宏深襟靈闊遠物我俱融徹滔滔
欲海回頭一棹超越試看南墅開樽西池垂釣此箇
情懷別記得婆婆亭上酒還到壽君時節我夢登天羣
仙相對曾寫長生牒見君姓氏分明非是虛說

壽李長卿

臨江仙

十月小春天氣好
堯莫五葉初開
長庚曾記夢中來
襟靈元灑落
風骨不塵埃
瑞靄雲生香滿室
安排北海尊壘
仙人來獻紫霞杯
共添山海壽東閣
勝蓬萊

登鯨川樓

大江東

飛樓縹緲礙行雲
勢壓鯨川雄傑
賓主落成登鯨日
正是炎蒸時節
把酒臨風憑欄
一笑忘盡人間熱
四圍煙樹萬家金碧
重疊休問去棹來帆
南商北旅歡會并

離別且向樽前呼翠袖歌取陽春白雪千古興亡百年
哀樂天遠孤鴻滅酒闌人散角聲吹上明月

賦芍藥

浪淘沙

春去牡丹空誰繼芳穠彩雲香散畫欄風喚起詩人供
一筇絕艷難逢 題品斷腸中心事誰同千年溱洧自
流東折得芳華人不見幽恨無窮

退隱

春從天上來

綠鬢凋零看幾度人間春蝶秋螢天地為室山海為屏

收浩氣入沈冥便囊金探盡猶自有詩筆通靈謝紅塵
且游心汗漫濯髮清冷平生眼中豪傑試屈指年來
稀似晨星虎豹關深風波路遠幽夢不到王庭任浮雲
千變青山色萬古長青醉魂醒寒燈一點相伴熒熒

蘭軒集卷九

欽定四庫全書

蘭軒集卷十

元 王旭 撰

表

賀正表

建寅以為人統於夏禹得天道之中頒歷以授民時在
唐堯重歲功之始惟天於陽而主德故正以王而次春
泰履三元歡流萬國恭惟陛下巍巍出震穆穆承乾披
皇圖稽帝文知人天之共應降氤氳調元氣與海宇以

咸春衣冠盛漢代之儀禮樂復周家之典開明堂而受
朝賀中興獨播於歌謠禪梁父以告成功盛事猶存於
搗挹靈祇受職川嶽揚休栢葉稱觴回醇風於四海椒
花獻頌映聖容於萬年臣某等沐浴鴻恩優游元化金
城千里忝膺委寄之權紫極九重莫既攀依之戀望雲
徒切傾日奚窮輒陪嵩嶽之呼用續封人之祝

長蘆運司賀正表

三陽出地呈乾坤開泰之祥萬國朝天仰日月照臨之

盛歡生宇宙慶洽山河臣某中賀恭惟皇帝陛下道德
崇深規模宏遠扇仁風以春四海運元氣以育羣生持
盈守成治道有光於前列繼志述事孝心無愧於先朝
臣某等職限醮司身留海甸獻椒花萬年之頌阻進拜
於瑤階望蓬萊五色之雲但馳情於金闕

七星迴而建寅歷數重新於夏正三陽進而為泰卦爻
獨驗於義經方四海之無虞宜一人之有慶臣某等恭
惟陛下巍巍出震赫赫乘乾發政施仁廣天地好生之

德順時圖治運陰陽不測之神惠澤橫流威靈遠暢臣
某等職居齏運身繫藩方天闕九重徒望卿雲之五色
聖人萬壽願廣神嶽之三呼

天周玄度既占七政之齊氣轉洪鈞又見三陽之肇一
人有慶四海咸春臣某等恭惟陛下時乘六龍首出庶
物含弘光大德符坤厚之有常剛健粹精道協體元之
不息國安磐石祚衍江河某等職限齏司才乏鞭算瞻
望北闕遙馳向日之誠拜舞東風仰祝同天之壽

稽三百六旬有六日履端唯在於今朝數十二萬年為
一元衍歷正符於皇號歡留宇宙慶洽天人恭惟皇帝
陛下道配乾坤明侔日月扇仁風以春四海沛澤雨以
潤羣生航海梯山悉是效貢珍之國普天率土無非奉
正朔之臣寶祚光隆鴻圖悠遠臣某等叨司醴運阻造
朝班想九奏於鈞天但覺臣心之踴躍效三呼於嵩嶽
唯祈聖壽之延長

擬入辭翰林學士表

竊以金馬特徵非賢莫預玉堂清選惟才是居蓋文章
為職業之最優而制誥乃王言所自出自非名高一代
望伏羣儒則何以潤色皇猷鋪張帝典如某者中才淺
短曲學荒疎雖盛虛名有乏實用富嘉謨之孤峰絕岸
恐不免廊廟之譏閭朝隱之麗服靚粧適足貽風雅之
罪顧自知者如此在公論亦應然况半世麻衣不作彈
冠之夢滿頭絲髮還過致政之年豈謂恩光忽臨衰朽
茲蓋伏遇陛下厲精為治待旦求賢恥一物不入於牢

籠欲羣才咸登於進用聽左右之過舉致絲綸之誤頌
然漢祖寬仁尚能容於綺皓豈唐堯大聖反不外於巢
由敢瀆聖明乞停恩寵櫟樗臃腫願全斤斧之餘生麋
鹿優游俾遂山林之本性

收社樗為棟梁雖匠氏之殊恩而終違乎本性養海鳥
以韶濩誠國人之至意而反重乎悲愁蓋物當各聽其
所安而人不可強其所短玉堂金馬自宜得非常之賢
而蓬鬢麻衣亦欲安垂朽之質雖君臣之義不可廢也

奈進退之禮當合宜哉豈有區區七秩之年猶行擾擾
衆人之仕况臣謀猷不足以經國學術不足以致君談
笑有滑稽之名文章非風雅之正詩酒放浪之已久衣
冠收斂以誠難政使精神未衰筋力猶壯且思泥塗之
曳尾不願文繡之為犧矧茲殘喘之餘可辱特徵之命
徒虧禮典無益國家伏祈聖明特垂矜察戴堯天瞻舜
日幸逢朝野之雍熙洗許耳飲巢牛願遂山林之偃蹇

天壽節賀表

氣肅金天喜見壽星之現丙虹流華渚適當彌月之及
辰慶洽三靈歡騰四表臣某等恭惟陛下聰明冠古神
武應期赫赫明明已極威靈之震耀巍巍蕩蕩莫能功
德之形容臣等忝在鴻鈞恭逢盛旦望天門而再拜難
陪序進之千官效神嶽而三呼願獻太平之萬歲

祥流虹渚秋時當萬寶之成運應龍圖歷數協一元之
永歡騰九域慶洽三靈臣某等恭惟陛下道本生知才
膺首出剛健中正而純粹體乾元不息之誠含弘光大

以直方合坤厚載物之義天人共順神聖難名臣某等
身在陶鈞職拘齶運班聯文石阻陪北闕之千官拜望
堯天願獻南山之萬壽

氣肅金天適值貞元之會合祥開寶運宜膺歷數之延
長慶洽河山歡騰宇宙臣某等誠懼誠忤頓首頓首恭
惟陛下德協坤厚載物而有常道符乾元統天而無外
海流國祚山鞏皇基臣某等身繫齶司心馳禁闕望五
雲之瓊島但遙陪嵩嶽之呼捧萬歲之玉觴願仰祝聖

人之壽

玉露金風萃天地清明之氣渚虹樞電昭皇王神聖之
祥彌月載臨普天同慶臣某等恭惟陛下道德廣運聰
明生知武烈文謨丕顯承而罔缺堯仁舜孝煥巍蕩而
難名光臨萬國之山河大啟一元之歷數皇圖永固寶
命長新臣某等身遠闕庭職拘蹇運上恩未報慚訶天
保之詩神應無差願獻嵩呼之壽

九重玉氣長瞻龍虎之浮空千載貞符又覩聖神之御

世金天紀瑞陸海流歡臣等恭惟陛下道義生知聰明
天縱首出庶物時乘六龍運啓皇元數允協一元之永
年稱大德又更兼三德之施國祚隆長基圖鞏固臣某
等志在祝堯敢獻華封之頌心存報上願歌天保之詩

上書

代鄒陽遊梁上孝王書

臣聞天下縉紳遊談之士莫不朋從類聚以語大王之
賢而咸欲佩陸離曳長裾以遊梁為事者臣不知大王

何以得此於當世哉豈非忘萬乘之勢敦布衣之禮尊
賢好古義聲昭布有原嘗春陵之實也哉臣東齊之鄙
人負不羈之才懷慷慨之節遨遊四方竊高大王之風
久矣是以息肩東南雖辱吳王千金之盼而私心區區
不以為樂膝行西來而欲委身於大王之下風夫以梁
國之大四通五達當天下舟車之衝鞞鞞殷晝夜不
絕百姓富庶邑里相望犬吠雞鳴達乎四境而加以大
王之賢寵冠乎天朝名高乎列國深拱乎穆清之德達

觀乎昭曠之道使豪傑英又鱗集闕下獻籌納策畫良吐竒而大王之名巍巍蕩蕩與漢無極不亦休哉伏惟廓日月之明恢江海之量使郭隗有先登之榮荆人無三獻之恥則臣將披肝瀝膽銜恩感激捧毛遂之銅盤度荆軻之易水指麾顧盼惟大王之所欲為矣昔呂望釣於渭濱周文載以為師傅說築於虞號高宗用以為相蓋聖人之心超然遠覽卓然獨斷越擊拘之說馳域外之見所以英聲茂實飛騰千古而非後世之能及也

臣之愚陋雖不足望昔賢之萬一而區區慕義惟大王之留意焉

代鄧禹上蕭王書

禹聞智勇之才不備則不足以定生民之亂仁聖之謀不遠則不足以成天下之功往者亡秦之亂高祖起布衣提三尺驅策豪傑不八年而定天下成功若是之速者豈非智勇之才備仁聖之謀遠哉方今漢祚中缺逆莽新誅天下紛紛未知定向而更始以凡庸之才坐擁

大號臨御失統民心不屬諸將驕橫曾無遠略而赤眉
銅馬之屬動百萬數以禹觀之天下之亂未已而非有
雄才遠略如高祖者不足以答四海之望救生民之命
也伏惟明公以帝室之胄英明果決仁慈寬厚備文武
之大略懷英雄之遠圖因民心復祖業誠明公今日之
事無難也禹不佞請言當今之計而明公試擇焉兵法
曰軍無委積則亡無糧食則亡是知委積糧食乃用兵之
本興王之所不可闕也明公自昆陽之戰功已隆而威已

著矣然所謂委積糧食恃以為用兵之本者禹猶未之見焉如此則雖有征伐之勤而明公之勢則殆矣今河內險要富實天下腹心之地而韓歆為之主非明公之敵也明公不若引兵而先取之積穀練兵徐收燕趙進無乏絕之憂退有本根之固然後施明德奮威武以收百姓之心以延英雄之策則山東可不勞而定也赤眉更始勢不並立關中指日必有相攻之釁明公養威蓄銳起乘蚌鷸之勢以收漁人之功則長安以西可一舉

而平矣反更始之弊政紹大漢之鴻基布德流澤洗滌
四方而禹亦得以效其尺寸流功名於無窮者固禹心
之所期而明公之所當務也若夫恃同學之私求一命
之寵而區區於目前之近利豈禹徒步遠來之志哉畧
陳愚忠惟明公其圖之

啓

代人上執政啓

豐獄未開寶劍騰輝於雷煥鹽車久困龍駒驤首於孫

陽蓋不遇於當時斯有望於知己如某者衡茅賤士陋
卷窮儒半生玩志於詩書十載寒心於筆硯家貧親老
運拙時乖北闕黃金不買凌雲之賦南山白石誰聽叩
角之歌壯志難酬流年易往託孤劍於千里求知音於
四方鷗化三千勢實資於海水鵬飛九萬力仍假於天
風不有大賢誰哀壯士今者伏遇執事賦以寬宏之量
卓為俊逸之才橫翔日月之邊進退羣士而在其手高
步雲霄之上冠壓百吏而為之師規模宏深事務詳練

紀綱不失經綸有方宋廣平鐵石心至公而無私裴琰
之霹靂手處繁而不亂無臧孫竊位之愧有周公下士
之勤聲名赫赫以傍流事業巍巍而獨著可謂劍逢雷
煥馬遇孫陽臺金九層何敢先於郭隗囊錐一出請自
贖於平原儻一言可以為終身之榮則九死不敢忘他
日之報

賀正啓上杜止軒

大哉乾元萬物資始展矣君子百祿是宜當天道之大

亨在人情以為慶風霜引殘臘避東閣千年之觴造化
迴陽春入先生五色之筆恭惟先生高名掩日絕學際
天卓為四海之精英渾是一團之和氣優游文市持昌
黎之權衡嘯咏詞場專少陵之旗鼓詩酒自樂神仙誰
如履茲朋來之辰宜亨彙征之福某摳衣在列提耳知
恩數仞門牆欲探陽春之消息三年節物自驚禮意之
蕭條愧無惠連春草之工聊代南華靈椿之祝

疏

碣山重修大成殿及新建祭器神厨等屋助緣

疏

觀諸生時習之齋既丹青之炳煥仰先聖大成之殿猶棟宇之崩頽欲坐視以何安必重修而後可況春秋祭祀犧牲無烹宰之厨簠簋豆籩器物闕收藏之所理當營造事貴圓成雖同僚協志以相從必衆力揮金而後濟或多或少請各隨君子之願心若子若孫期共饗聖門之清福聊行短疏可署芳名

嶧巖何大師重修龍泉庵疏

三清香火欲共成嚮道之緣陸地蓬萊宜大啓棲真之館儻非願力曷贊洪規今者伏見嶧巖老師道價素高塵心久息將停鶴駕闡玄教於一方遂卜龍泉來羽流於千里境因人勝事以衆成苟豪傑肯樂於揮金則棟何憂於構厦異日壺中寶界豈閑身一榻之獨安他時甌裏黃梁願逆旅諸人之共飽聊憑短疏用謁高賢

滄鹽司重修公廨疏



居不求安雖曰聖人之有訓事當起廢詎容君子之無
為迺睠滄鹽之一司不堪公解之久弊將圖輪奐曷議
增修况今日之長蘆多輕財之義士理橋梁興書院香
名已播於四方焚債券建神祠令譽復喧於衆口諒既
有施於彼矣獨能無助於斯乎或少或多不拘所得之數
若貧若富各隨自願之心但破慳風便成勝事三年傳
舍勤勞豈係於身謀一旦成功永久將為於後計聊陳

短疏請署芳銜

泰安州重修巖巖亭疏

懷邵公之德必封植於甘棠慕陽城之賢亦徘徊於古
驛蓋思其人則愛其樹而撫其舊則圖其新矧此巖巖
之亭實居表表之地臨於嶽麓構自徐公名傳四方勢
負三觀嗟歲月之徂邁為風雨之侵凌棟宇將頽英靈
弗樂豈唯孤來者覽勝之志抑亦鬱邦人懷賢之心欲
議重修須煩衆力使工師求大木行當見棟梁之來求
富室施餘財想應無毫髮之吝共成勝事不愧神仙期

壯觀之一新與羣情而胥悅他時亭上願陪父老以壺觴今日疏中請署英賢之姓字

季公敏鳩金疏

丈夫處世誰無暫困之時豪傑輕財必有相賙之義竊見某人志氣英邁才學高明曩為耽書不屑簞瓢之計今因糊口遂深桂玉之憂錢神絕交山鬼見笑然豐城寶劍難埋紫氣之干霄而滄海靈槎終見仙遊之犯斗恩能施於此日報必在於他年宜開魯肅之胸襟少副

周瑜之願望

張文叔鳩金疏

固窮雖君子之本心從權亦可周急乃聖人之明訓過
惠何傷試求當世之賢豪少慰行囊之羞溢竊見某人
妙齡挺秀奇志不凡曩乘龍馬氏之門風流一夢今泣
鮒莊生之轍憂患百端悼佳人寄殯之未歸慨薄宦遠
遊之無力聽江湖之夜雨自厭淒涼看桃李之春風誰
專造化未遇指困之子敬誰為贈麥之堯夫苟能義重

而財輕便可聲同而氣應當觀柎載勿泣途窮兩翼相依正有連天之大厦雲帆既舉應無載月之空舟儻肯披襟何妨涉筆

張子羽鳩金疏

莊子大賢未免謁齊侯於河上周郎奇士亦嘗干魯肅於江東惟時方困於貧窮其勢必資於豪傑勿談往昔且論當今竊見某人德業無虧聲華素著薦書已達將彈貢禹之冠行橐猶空難上長安之道用陳短疏遍謁

諸公願得春風送上雲霄之一鶚莫教明月載回江海之孤舟既肯開襟何妨涉筆

趙君寶鳩金疏

秣騏驥於窮途則玉山之禾不若束芻之為惠活鯨鯢於陸地則滄溟之浪何如斗水之為恩是以賢達之相矧必於英豪之未濟義當為者今豈無之竊見平陽趙君寶者侷儻不羈聰明罕及事業見止軒之親序學派出貽溪之正傳明月之珠雖則暫淹於泥滓青雲之器必不久在於塵埃頃因旅病之纏綿遂致行囊之羞澁故不免掉猛虎乞憐之尾庶幾見高人仗義之心彈鋏朱門既曰聞風而至釣鼈滄海無令載月而歸敢告同盟共成斯美

魏秀才鳩金疏

家貧親老誠難為孝子之心日暮途窮尚未息行人之駕苟非豪傑誰慰飄零竊見某人志在窮經心存好古將希賢哲以獨進無簞瓢之屢空拙於謀生致此失所

欽定四庫全書

蘭軒集
卷十

十五

然豐城之劍決不至於久埋而銀漢泛時乎未遇命也何言因思重義之施於前而報於後敢忘他年積其少日

趙君山鳩金疏

君子秉心雖曰固窮之是念聖人垂言欲振義風須憑豪傑竊見教授尹才學俱高鷗鵬不蓄於池籠逍遙石偃蹇山林唯歲月之久閑遂簞瓢無寒乞之語顧我輩宜有扶持之心敢必希蹤於前哲散囊金揮幣幣示疏既陳芳名請署

周景遠鳩金疏

陶令歸來歲暮每歌於貧士杜陵老生嘆賢哲之乏財視古今而同調竊衣食計拙風流勝而勢利情疎曩計

欽定四庫全書

蘭軒集
卷十

之槎終當期於遠
賢必有輕財之舉
而成其多聊圖今

訓亦嘗周急以為
石山先生聲名素著

云海梁棟未逢於匠

十六

之有闕在伊人雖
指粟廩捐麥船未
小何妨先於時人短

去途窮多仗於友
見某人才氣高而
牛刀嘗為厭煩而

解去旋遊蓮幕復因多病而辭歸債券相仍朋簪未減
文翰徒推於雙美簞瓢不救於屢空在伊人雖無寒乞
之聲顧我輩宜著扶持之力道同則氣合義重斯財輕
兩翼相依幸有連天之大廈雲帆既舉應無載月之空
舟

成生喪偶鳩金疏

舉案齊眉中饋須憑於德耀鼓盆歌切愁懷難遣於莊
生既無種玉之方宜有鳩金之議竊見某人妙齡秀發

中道鰥居雖夫婦人倫之大綱廢則不可奈錢財世俗之先務辦亦寔難欲合二姓之懽必賴衆賢之助或多或少力各隨於願心宜室宜家恩敢忘於他日

侯方秀鳩金疏

送使君以百錢昔嘗有山陰之父老破慳風於一舉今豈無碣邑之豪英見義須為當仁勿讓茲者竊見文秀提領學兼儒吏德備循良三年久滯於簿書一節常持於冰蘖曩因羣小之妄訟遂致一閑而至今生理寔艱

行囊莫辨猛虎掉穿中之尾未免乞憐大鵬拔身上之
毛何妨為惠

劉宅追薦疏

百年哀慕難忘孝子之情一氣感通冀獲神明之祐輒
傾丹懇用瀆玄穹伏念臣父某母某氏生居塵世想愆
過之不無往隔冥途懼罪罰之或有非憑道力孰極幽
陰是用敬邀羽流恭陳寶籙伏願三靈降鑒列聖垂祥
黑簿銷名永出沉淪之域朱陵注籍超昇快樂之鄉

李宅追薦疏

三年哀苦俄終祥禫之期一氣感通庶集幽明之祐輒
傾丹悃用瀆蒼穹伏念臣父某臣母某氏在生之時恐
不無於過咎既往之後或未免於沉淪欲伸薦拔之功
須仗禱祈之力伏望高真降鑒列聖垂休憐孝子皇皇
之心少從其欲俾亡人熒熒之魄各遂其安永銷黑簿
之名早注朱陵之籍

范宅追薦疏

竊以生死兩途雖曰幽明之有隔感通一氣故應上下
之無殊輒控微忱仰干洪造伏念臣父臣母恩深海嶽
報未毫芒辭浮世以長終與流年而俱逝興言永慕追
感奚窮思欲脫於輪迴必須憑於道力重念臣一身微
賤二子頑愚不無悔吝之愆懼獲明神之譴是以敬涓
吉日爰啓齋壇邀淨士於琳宮披靈文於寶笈伏願高
穹委鑒列聖垂休俾既往之沈魂早超昇於仙界保見
存之餘衆永壽樂於人寰

高宅薦父疏

無父何怙終身抱孤露之悲有感必通一氣罔幽明之間輒伸哀籲冒瀆高穹伏念臣父某惟昔在生之時素敦為善之志慈孝無虧於上下賑施常及於憂貧豈料微疴遂臻大故痛哉有如此者命也為之奈何日月交馳俄及小祥之際精誠上訴冀蒙昭格之慈伏願賜之矜憐宥其愆過辭玄闕之長夜永脫沉淪御碧落之剛風任從來往

高宅除喪薦親疏

喪制有終日月既臨於祥禫孝思無極幽明或冀於感
通輒罄丹誠用干鴻造伏念臣父某臣母某氏昔居塵
世素稱善人自一掩於泉扉遂三更於歲律雖則嘗伸
於薦拔終恐未免於沉淪敢因醮祭之儀再致虔恭之
禱伏願居高鑒下少從人子之欲心革故從新俾證真
仙之妙道廕庥所及存歿惟均

趙通叔脩蓋房屋疏

寄閑身以五柳之居官已休於陶令庇寒士以千間之
厦心猶切於杜陵欲就洪規須憑義衆竊見前縣丞趙
君通叔起立城邑既有其功招集人民又多其力挂冠
歸老仰高節而莫攀樂道忘貧顧空囊而不恤然有瓦
礫之地正當市井之間既不可以棄捐必須為之經理
費用浩大財力殫微儻非見助於諸人安得能成於此
事是用上謁皆請破慳各隨願欲之心不限多少之數
堂基既築何憂肯構之無人匠斧不停將見落成之有

日

檄

擬劉裕討桓玄檄

弑國戕宗古無其赦亂臣賊子人得而誅逆臣桓玄者
其父溫始以姦雄之小才爰秉征伐之大任寵冠內外
恩隆古今未能盡節以酬君輒欲乘時而竊國所賴天
奪之魄鬼戮其身殃未及人怨已在世夫何流離之惡
鳥再生毒害之凶巢不思蓋乃祖之愆更轉作王家之

厲長戈指闕流矢射天內蘊猖狂之謀躬行篡弒之逆
僭竊神器瀆亂天常蛇豕恣其貪殘豺狼奪其威虐毒
流百姓禍遍三吳造桓氏千萬世之惡名覆晉宗二百
年之大業罪已浮於羿莽誅未即於天人義士痛心忠
臣切齒匡復之舉今誠其時嗚呼宗周亡而嫠婦興悲
韓國滅而張良思奮裕等厲揚忠義糾合驍雄起漢家
南陽之義師紹祖宗金陵之王氣龍吟虎嘯雲集風驅
寶劍橫乎秋霜珠旗曳乎明月勝兵十萬勁騎千羣將

有韓白之能人皆諸劓之勇感激則乾坤動色叱咤則
川嶽生風伐雲夢之竒材運廣陵之紅粟以此而動何
功不成尚須同志以相扶不可義聲之獨擅凡在王土
孰非晉民願各懷報國之心期共斬逆臣之首移檄所
至無得遲疑



蘭軒集卷十